



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Taoba Afghan VP kidang nungi sen million \$6.5 den hon ngutet: Taliban

Trinamool-i Rajya Sabha MP inyaksü atema Sushmita Dev shim

VOL. XVIII NO. 333 (ADOK 333) DIMAPUR

RASEMNÜ (WEDNESDAY)

RONGJUI (SEPTEMBER) 15, 2021 ₹ 5.00

Assam-Nagaland arrtsü atema Select Committee senden amen

Dimapur, September 14, 2021 (TYO): Nagaland-Assam arrtsü mangatetep atema Nagaland Legislative Assembly (NLA)-i tawa tu select committee ka tentetiasü aser tanü parnok mezüng senden menogo.

Senden amenba sülen Border Affairs & Horticulture Advisor Mhathung Yanthan-i osangbener den jembidang "onoki Assam den arrtsü tebilemstü aliba onük lemsatep" ta ashi.

"Arrtsü onüktem timi angateteptsü atema Department of Border Affairs dang inyakyim latettsü mapa lezmüksüogo" ta paisa ashi.

Onoki maneni sendentem mena sentong renemtsü. Onokisa Assam sorkar aser Union ministry dena osang agiteptsü, ta Advisor Yanthan-i ashi.

"Nagaland-i iba tebilemstü ya okadaki moi angateteptsü atema

takhangba agüja arur. Nagaland-isa border commission ka tentettsü akhanger saka tang tashi item ya matalok lir. Iba onük okadak benoka lir saka onoki okadaki moi angateteptsü meranger" ta paisa ashi.

"Select Committee-i Nagaland aser Assam nung lisopur teloktem tentettsü aser parnok sabang ka nung mener olemteptsü atema tebilemba lemsatepogo. Lisopur teloktemi state sorkar aser Centre-i ashiba angaa arrtsü onük angateteptsü" ta NPF Legislature Party Leader TR Zeliang-ia ashi.

Nagaland aser Assam-i külen tsütsü shia yangluba interim agreements jungjunga reprangshitsü, ta Zeliang-isa ashi.

Assam chief minister den tesentaktep tajung lir anungji state sorkar anaprongi iba onük asoshi telemtetba tajung agitsü imlar, ta paisa shisem.

Nagaland dena state 11-i Rs 15,721 crore aputsü melar

New Delhi, September 14, 2021 (Agencies): Union Finance Ministry-i state 11 nem Rs 15,721 crore talila apuloktsü atema temelaba agütsüogo.

State 11-i June quarter atema capital expenditure tongadokba atema sen talila aputsü melar.

State temji- Andhra Pradesh, Bihar, Chhattisgarh, Haryana, Kerala, Madhya Pradesh,

Manipur, Meghalaya, Nagaland, Rajasthan aser Uttarakhnd lir.

"State 11-i Ministry of Finance-i 2021-22 indang 1st Quarter nung capital expenditure alizüing ayuba tongogo. Iba jagi teyari ama Department of Expenditure-i state 11 nem Rs 15,721 crore talila apuloktsü atema temelaba agütsüogo" ta Ministry-i metetdaksü.

DCCF-i DCCI & CNCCI pusemer

Dimapur, September 14, 2021 (TYO): Dimapur Chamber of Commerce & Industry (DCCI)-i September 16, 2021 nü Dimapur nung dokan aser shishilembadakh ajak shibangtsü ayongba nung Dimapur District Citizens' Forum (DDCF)-ia pusema nungiter.

Telok balala den sorkar agency temi ozüing alema tax kanga saruba ajanga shishilembartem timtemer aser iba khuret yagi consumers dak kongshir, ta Media Cell, DDCF-i sangdong ka nung ashi.

DCCI-i September 16 nü shishilembadakh ajak shibangtsü ayongba nung kin hohotem aser non-tribal telok ajaki pusema nungittsü ayongzüker, ta DDCF-i metetdaksü.

DCCI-i dang masü saka Confederation of Nagaland Chamber of Commerce & Industry (CNCCI)-ia September 16 nü state ajungalen shishilembadakh shibangtsü ayongzüba nung DCCF-ia pusema nungiter, ta Media Cell-isa ashi.

RN Ravi-i Dimapur nung "Patients' Hostel" yanglutsü lemtet

Dimapur, September 14, 2021 (Agencies): Nagaland Governor RN Ravi-i Tamil Nadu nung Governor inyaksü atema apusoa aotsü anogo ka lia Dimapur nung 100-room patient hostel ka yanglutsü sentong atongogo.

Nagaland kübok meta talang pilar alidak nungi Dimapur nung temang anepalutsü atema arurtem khuret ajema kümdaktsütsü atema RN Ravi-i iba telemtetba agi.

Dimapur nung parnok sen dalang agi anenzükdak peria maliba ajanga Ravi-i patient hostel yanglutsü shisatet.

"Dimapur nung aliba commercial lodges aser hotels ji sensakertem atema kanga jenjang tasak lir" ta Raj Bhavan sangdong ka nung ashi.

Union Minister of Power, New and Renewable Energy, Raj

Kumar Singh-i iba mapatong inyaksü atema sen agütsütsü kanga dang molungsoa nangzüka atema pelar, ta RN Ravi-i ashi.

Governor Ravi-i tuyuba ama Dimapur Deputy Commissioner Rajesh Soundararajan-i patients' hostel yanglutsü atema ali nguogo.

Governor-isa Dimapur DC nem iba mapa ketdangtsü inyaksü mapa nungloktsüogo.

Ravi-i State sorkar dang deputy commissioner nem nungdakba teyari agütsütsü aser tekaratiba nung iba mapatong inyaksü atema mepishia metetdaksü.

Dimapur nung takdang 100 aliba patients' hostel yakta renemtsü aser iba ajanga nungdakbapartem yaritsü ta RN Ravi-isa ashi.

Nagaland sorkari CNCCI dang mokdang agentsü mepishir

Dimapur, September 14, 2021 (TYO): Nagaland state sorkari CNCCI dang September 16, 2021 nü state ajungalen shishilembadakh shibangtsü ayongba meyipa agitsü mepishia metetdaksüogo.

State sorkarisa CNCCI dang sorkar department temi ozüing alema tax saruba/tashiyim agi sen saruba khuret azioktsü atema inyakba nung yariteptsü ayongzüker.

Dimapur district nung nung ozüing alema tax saruba/tashiyim agi sen meshiba onük den ano ULBs ajanga items tax/fees agiba atema tanü Nagaland sorkari senden ka menogo.

Confederation of Nagaland Chamber of Commerce & Industry (CNCCI)-i September 9, 2021 nü shidi agütsüba nung keta aliba onüktem atema iba senden ya Deputy Chief Minister menden ser amen.

Senden nung Advisor, Urban Development and Municipal Affairs, Chief Secretary, Nagaland, DGP, Addl. Chief Secretary & Finance Commissioner, Principal Secretary, Urban Development and Municipal Affairs, Principal Secretary, Home, Commissioner, Nagaland aser tanga ketdangsurtem aden.

Nagaland nung Municipals aser Town Councils ajaki GST regime kübok adenba items/goods nung tax/fees agiba anentsü atema tanü

senden nung telemtetba agi.

Iba atema Government Department/agency-i GST regime kübok adenba items nung tax agiba anentsü atema tetuyuba agütsütsü.

Senden nungsa Commissioner of Police, Dimapur-i PHQ den asüngdangtepa ozüing alema tax saruba/tashiyim agi sen meshiba azioktsü atema mapa inyaksü, ta senden nungsa lemtet.

Urban Local Bodies nung Administrators-i pei pei yimti/jila nung advisory committees nung shishilembartem asoshi menden lezmüksütsü atema mapa inyaksü ta senden nungsa lemtet.

Nagaland Legislative Assembly indang Select Committee kati Securitization and Reconstruction of Financial Assets and Enforcement of Security Interest (SARFAESI) Act, 2002 atema reprangshimdar aser iba Select Committee September 14, 2021 nü senden amentsü lir ta senden nungsa metetdaksü.

Item onüktem nung ajemdaker state sorkari CNCCI dang September 16, 2021 nü state ajungalen shishilembadakh shibangtsü ayongba meyipa agitsü atema mepishia metetdaksüogo.

WINTERSESSION NUNG SARFAESI ACT ASER LAND LAWS BILL BENOKTSÜ: Taruba State Assembly indang

winter session nung SARFAESI Act 2002 aser Land Laws Bill benoktsü ta Nagaland sorkari tanü telemtetba agiogo.

"Mongulbarnü State Assembly Committee Room nung Securitisation and Reconstruction of Financial Assets and Enforcement of Security Interest (SARFAESI) Act atema Nagaland Assembly Select Committee senden amendang iba telemtetba agi" ta Planning and Coordination, Land Revenue and Parliamentary Affairs Minister, Neiba Kronu-i ashi.

Nagaland nung SARFAESI Act mapa küma inyaksü atema ano mapang talila agitsü saka tang atema onoki Act indang draft nung onük kar bendenloker winter session nung agütsütsü lemtetogo. Iba den Land Reforms Bill benoktsü, ta Minister Kronu-i ashi.

"Asenoki 'patta' ta asüba along amshia arur saka iba ya sorkari nisung ka nem ali agütsüba indang lir. Asenoki 1978 nung yanglushiba Assam Land Laws of 1886 indang act ka amshir aser mapang shia state sorkar iba ya melenshia arur" ta paisa metetdaksü

"Nagaland indang ali ozüingtem balaka alitsüla aser tanü senden nung iba atema jembioogo" ta Kronu-isa metetdaksü.

Interlocutor tasen ajanga Naga yimjung olemtep tejakleni bener aotsü imlar: NPF

Kohima, September 14, 2021 (TYO): Naga yimjung olemtep atema interlocutor tasen AK Mishra ajanga tekaratiba nung Naga yimten tebilemstü atema telemtetba agitsü imlar, ta taoba Chief Minister aser Naga People's Front (NPF) Legislature Party leader TR Zeliang-ia ashi.

Taoba Intelligence Bureau special director Akshaya Kumar Mishra-i küm ka jungnüa NSCN (IM) den jembishinüa arur, ta pai ashi.

NSCN(IM)-i Interlocutor aser Governor RN Ravi den jembishinüa asütsü memolungba sülen India sorkari tiyongtsü ia jembitsü atema Mishra shima liasü saka tang pa Interlocutor shimba ajanga mapa tajungba inyaka aotsü, ta TR Zeliang-isa ashi.

India sorkari Naga yimten tebilemstü angateteptsü atema nisung ana meshimtsüla. Iba ajanga mapa shitak meinyaktettsü aser mapang atsülangtsü. Anungji, Ravi-i Nagaland Governor mapa yutsüba sülen interlocutor tasen ka shimogo, ta paisa metetdaksü.

"Prime Minister Narendra Modi

asera A K Mishra naprongi Naga tebilemstü angateteptsü atema mendaka inyaker. Joko parnok tsüingda Naga wako aser temzüng amala onüktem angateteptsü dang anünga lir aser telok anaprongi telemtetba ka aginüra item onüktem angateteptsü akok" ta TR Zeliang-isa metetdaksü.

NNPGs teneti interlocutor Mishra shimba magizükba atema Zeliang-isa "telok kari agizükaka mesüra magizükaka interlocutor den jembitsüsa akümtsü" ta ashi.

Mishra-i kechong merangtepa agentettsü kechiyong pa ya Prime Minister-i tashi agüja shimba lir, ta paisa ashi.

Naga yimjung olemtep tenzükdang opposition maliba sorkar nungi MLA 60 prongi nungitsü aser onoki Naga National Political Groups (NNPGs) Working Committee aser NSCN(IM) dang külema longjemtsü atema ashitsü, ta TR Zeliang-isa ashi.

"Onoki Nagaland nung kin 14 dang tongti telok ka tentettsü shiogo. Yamaji asü nungbo kin shia Prime Minister mesüra Home Minister dangi shidi balala

mezülutsü" ta paisa shisem.

MLA 60-i kin ajak adenba tongti telok ka den jembishinüba nung tajangzüker alitsü. MLA tem aser kin teloktem ka küma longjemba ajanga telok ana longjemtsü asoshi mapa tuluba inyaktettsü, ta TR Zeliang-isa ashi.

Nagaland United Government (NUG) mekümteba atema TR Zeliang-ia olen ka ashidang "BJP national leaders-i State BJP dang sorkar nung adentsü shiogo aser iba atema September 18 nü NDPP, NPF aser BJP teloktem senden ka amentsü" ta metetdaksü.

Iba sülen sorkari NLA Speaker dang People's Democratic Alliance (PDA) nungi People's Democratic Alliance (PDA) melentsü atema shidi zülutsü, ta paisa ashi.

"NPF legislature Party-i sorkar nung portfolio kecha meshia mali. Onoki Naga yimten tebilemstü asoshi tekaratiba nung telemtetba ka agitsü atema sorkar nung adener" ta TR Zeliang-isa ashi.

"Onoki taküm Khristmas matongdang Naga yimten latetdaksünür" ta paisa shisem.

GST Council-i GST kübok petrol, diesel dendaktsütsü akok

New Delhi, September 14, 2021 (Agencies): GST Council-i Hokolbarnü petrol, diesel aser tanga petroleum products ajak national GST regime kübok dendaktsütsü atema lemtettsü akok.

GST council nung Central aser state finance minister tem dena lir aser Hokolbarnü Lucknow nung senden amendang COVID-19 essentials atema duty relief mapang atsülangtsü tema telemtetba agitsü akok. September 17 nü Finance Minister Nirmala Sitharaman menden ser GST Council senden amentsü sentong lir.

Tang ya India nung petrol aser jenjang tasaktiba lir aser GST kübok dendaktsütsü ajanga jenjang ajemtsü imlar.

Taküm June ita Kerala High Court-i writ petition ka nung ajemdaker GST Council dang GST kübok petrol aser diesel dendaktsütsü atema telemtetba agitsü tetuyuba agüja liasü.

July 1, 2017 nü national GST ajanga excise duty aser VAT amala agiena liasü saka iba nung petroleum goods 5- petrol, diesel, ATF, natural gas aser crude oil medendaktsü. Iba ya kechiba ta süra

Centre aser state sorkartemi item nung tax aika agiba ajanga sen angur.

Centre sorkari excise duty aser state sorkartemi Value Added Tax (VAT) agiba ajanga totzü jenjang tesadang ka adoker. Ajsütsüka totzü nung GST dang agira 28% den fixed surcharge ka dang asütsü.

GST kübok petrol, diesel aser tanga petroleum products dendaktsütsü, Centre-i petrol litre nung Rs 32.80 excise duty aser diesel nung Rs 31.80 agiba mangutsü. GST kübok tax ajak Centre aser state tem tsüingda 50:50 lemsar.

Dimapur nung NTEP, NTCP aser DAPCC senden menogo



Deputy Commissioner, Dimapur indang Conference Hall nung September 14, 2021 nü NTEP, NTCP aser DAPCC senden amendang tangokba noksa ka yangi angur.

Dimapur, Rongjui/Sept. 14 (TYO): National TB Elimination Program (NTEP), National Tobacco Control Program (NTCP) aser District Aids Prevention and Control Committee (DAPCC) pur küm nung pezüben amenba senden tanabuba September 14, 2021 nü Deputy Commissioner, Dimapur, Rajesh Soundararajan, IAS lenisüba kübok DC, Dimapur indang Conference Hall nung mena liasü.

Medical department ajanga sentong asemporng nung nukjiodong tongtetsüsa meranga inyakba atema Deputy Commissioner, Rajesh Soundararajan-i tenüngsang agütsü.

Ki-o-jen yanglua aliba mamshi tatok mekumdaktsüsü atema nüburtem nem angatetdaktsüsü asoshi awareness tali agütsüsü, ta ajungshia liasü.

Rajesh-i health worker dang

maneni tasü itshir awareness sentong nung tali rangloktsü ajungshia liasü. Dimapur district nung smoke free campaign maneni alitsü, anungji Smoke Free Offices kumdaktsüsü asoshi taruba DPDB senden amenba mapang mera balala agitsü onüktem benoktsü NTCP dang Deputy Commissioner-i ajungshia liasü.

Nüburtem asoshi awareness agütsüba nung arogo balalai tongti shilem agiba asoshi tenüngsang agütsüba mapang, DC ajanga arogo nung züngsem teyakyak tem amshitsü ajungshia liasü.

District administration nungi sentong asem nung SDO (C) Development aser EAC Development ya nodal officers asütsü, ta pai metetdaktsü.

District nung item sentongtem takok ngua inyaka otetsü asoshi ajak lungjemer inyaksü pai ayongzüka liasü.

Iba sentong nung tarur pela agizükba o jembiba mapang,

CMO Dimapur, Dr Moatemjen-i NTEP, NTCP aser DAPCC indang rateta ashi.

Department ketdangsurtemi TB Forum indang nukjiodong rateta shia liasü.

Smoke Free District Headquarters campaign indang nukjiodong aser inyaksangshiba osang Dr. Reyosalu Kase, DNO, NTCP Dimapur ajanga agütsü aser DPO, DAPCC Dimapur ajanga District Level Committee dang New India @75 indang nukjiodong lemsatep aser HIV & AIDS indang tensa metetdaktsü.

Iba sentong nung taneptsü ngur alirtemi takum kuli ashi aser Maova Village, Dimapur ajanga NTCP indang Tobacco Free Village adopt asüba atema Deputy Commissioner, Dimapur ajanga tepela temaitsü lemsatapa liasü.

Iba sentong nung Christian Forum aser All Nagaland Private School Association ajanga jembiba liasü.

NSCN (R) tenüng menüktsüba atema khukhua aitsür

Dimapur, Rongjui/Sept. 14 (TYO): Tuli nung mejangjaba nisung kari NSCN (R) tenüng amer September 12, 2021 nü sen saruba mapang Tuli Town Ward ajanga aridokba aser apuba osang angashia aoksar aser süngmanger, koba social media nung prokshia liasü.

NSCN (R) tenüng amer tim masüba mapa inyaker Imtiangshi s/o Lt. Temjenmenba, Imtisunep s/o Lt. Shiluinba, Merenkaba s/o Chubamayang (ajak Kangtsüng yimdak nungi) aser Anaki yimtsüng nungi Hempten Phom s/o Chingba Phom nungertem ya NSCN (R) züngsema masü aser onok den sendaktepa mali, ta NSCN/GPRN

(Reformation) indang MIP (Ministry of Information & Publicity) ajanga sangdong ka nung ashi.

Taziokba makai tim masüba nung tesem balala nung senotsü saruba magizüker aser dangar tenüng amer, tenüng menükja iba ama mapa inyakba maparen atema NSCN (R) ajanga jashia bilemba lemsataper, saka tangatet kija/telok/union kari ken o tejangja memeteti mesüra kuli tejangja monguteti tatem kumdakja Social Media tem nung sangdongba atema tezü atanger, ta sangdong ajanga ashi.

NSCN (R) madak teraksa tulu agütsüogo, saka item teraksatsüba/maksütsüba tera

danga samatsüsü mechi aibelener temi media balala nung jangjashitsüsüla aser tatok meshitsüla, ta NSCN (R) sangdong ajanga ashi.

Tarutsü nung maongka bushir aser dangar tenüng amer iba ama mapa inyakba nungi pila alitsüla, aji mesüra NSCN (R) nungi tapet temerenshi agütsüsü.

Osangkaket balala nung May 24, 2021 nü sangdongba ama NSCN (R) tanü tashi nokdaka lir, kong züngsem ajak dang tensa mejungi aliba mapang kecha nungia senotsü teyari memeshitsü mesüra shinga memerenshitsü, amokmeren masütsü sangdonga lir, ta sangdong ajanga ashi.



Poshan Maah benjongmung nung shilem ka ama ICDS Project ajanga Jericho-II Colony, Phek Town nung September 14, 2021 nü temang nung teyari agütsüba süngjanglijang aser aonsotsü sayuba sentong ka ayongzüka agidang Anyile Khama, DWO, Phek den Anganwadi nung inyaker, ketdangsur aser teyari angurtem tangokba noksa ka yangi angur.

Theological College tem dang Gran-in-Aid form agizüktsü metetdaktsü

Dimapur, Rongjui/Sept. 14 (TYO): Temsüa aliba Private Secular College tem aser Sorkari mela aliba Theological College tem dang 2021-2022 atema Grand-in-Aid form download asütsü metetdaktsüogo.

Iba form ya Department indang website

www.highereducation.nagaland.gov.in nungi download süa fill up sür Director, Higher Education nem September 20, 2021 nungi October 04, 2021 tashinung agütsüsü metetdaktsü. Latetja aliba anogo sülen agütsüba form kata magizüktsü, ta sangdong ajangasa ashi.

Dimapur nung nisung tasümang ka nguteta lir



Dimapur, Rongjui/Sept. 14 (TYO): Kushiabill Colony, Dimapur indang playground anasa Dhansiri ayong nungi mejangjaba nisung tasümang (arishi küm 40 shi tain non-local) ka September 13, 2021 nü nguteta lir, ta Dimapur Police sangdong ka ajanga ashi.

Iba nisungba ya tzü nung arakseta asü südi, ta temolung

melemi bilemer. Ozüng agi melaba ama teinyaktsü mapatem inyakba sülen tasümang ya post-mortem examination atema Dimapur Civil Hospital nung yua lir.

Kibur/kinunger/tembartemi Officer-in-Charge East Police Station Dimapur den t o n g t e p r a t e p t s ü metetdaktsüogo.

Khensa yimdak temsüa alir ajanga COVID mozü agiogo



Dimapur, Rongjui/Sept. 14 (TYO): Mokokchung district kübok Khensa yimtsüng nung temsüa alir nisung ajak September 14, 2021 tashinung Covishield mozü doses anaprong agiogo, ta Khensa Village Council Chairman, Imtitoshi ajanga sangdong ka nung ashi.

Temsüa alir nisung 700 shi June 17 aser 22 nü dose mezüngbuba agi aser dose tanabuba September 9 aser 14 nü agia liasü.

Iba maparen ya Khensa Village Council, Khensa

Students' Union aser ASHA, NSRLM Community Cadres aser Anangwadi temi tentetba Village Community Surveillance Team aser Mokokchung District Immunization Officer, Dr Ayangla Saku aser lar medical team lenisüba kübok Sub-Centre, Khensa indang staff tem lungjemer takok ngua inyaka liasü.

Mokokchung district kübok yimtsüng tulutem rongnung noklang nung noklang shilem COVID-19 mozü agiba yimtsüngji Khensa ya ka alitsü

New India @75 atema Dimapur nung Committee tentetogo

Dimapur, Rongjui/Sept. 14 (TYO): Deputy Commissioner, Dimapur, Rajesh Soundararajan, IAS ajanga sangdong ka nung New India @75 program mapa kuma inyaksü asoshi Dimapur nung District Level Committee ka tentetba metetdaktsü.

Iba Committee nung züngsemtem yamai alitsü, Deputy Commissioner ya Chairman ama alitsü, District TB Officer, Medical Superintendent, District Education Officer,

District Public Relations Officer, District Youth Coordinator, Nehru Yuva Kendra Sangathan, Principal, Dimapur Government College, President/members District Voluntary Blood Donners Association, District Welfare Officer, Department of Social Welfare, District Program Officer, District Aids Prevention and Control Unit ya züngsemtem aser Chief Medical Officer ya Member Secretary alitsü.

Myanmar nunger 1,800 tashi Mizoram nung jenoka lir: Minister



Aizawl, September 14, 2021 (Agencies): Tesüiba anogo ishika tsüngda Myanmar nungi nisung 1,800 tema Mizoram-i aruogo ta minister kati ashi.

Mizoram nung Myanmar nunger 11,035 jenoka lir ta police-i ashi.

Taoba hopta Burmese government-in-exile, National Unity Government (NUG)-i mitkartem anema noktaksü

ayongzükba sülen nisung aika Myanmar toktsür jena arur, ta Mizoram Home Minister Lalchamliaana-i ashi.

"Tesüiba anogo ishika tsüngda Champhai, Hnahthial aser Lawngtlai district tem nung Myanmar nunger 1,850 arua jenoka aliba osang angazükogo" ta pai metetdaksü.

State sorkari Centre dang Myanmar nunger asoshi

asylum meshiba ano telangzüba kecha mangu lir.

State sorkari Myanmar nunger yaritsü atema Rs 30 lakh agütsüogo ta taoba hopta Lalchamliaana-i state assembly nung ashi.

Mizoram kübok district 6-Champhai, Siaha, Lawngtlai, Serchhip, Hnahthial aser Saitual ajanga Myanmar kübok Chin state den kilometre 510 agi arrtsütepa lir.

TMC lenniri Agartala nung rally nung jembitsü

Guwahati, September 14, 2021 (Agencies): Trinamool Congress lennir aser MP Abhishek Banerjee-i September 16 nü Agartala nung sentong ka nung jembitsü.

Banerjee indang rally ya September 15 nung agitsüba liasü saka iba anogo temelaba manguba ajanga anogo atsulang.

Kasa anogo nung tanga party kati sentong ka agitsü temelaba anguba agi Tripura Police-i Banerjee'er rally atema temelaba magütsü ta TMC-i ashi.

Tripura Police-i September 16 nü rally agitsü atema temelaba magütsü saka onoki

iba anogo nung padyatra agitsü, ta TMC-isa metetdaksü.

Banerjee-i Tripura nung department shinga dang nungi temelaba memeshi ta osang angazüker.

Bodbar nungi Agartala aser temeket aliba district tem nung tensa mejungi küma lir aser iba atema Abhishek Banerjee-i Chief Minister Biplab Kumar Deb aitsütsü imlar.

Tripura nung CPI-M aser BJP züngsemtem tsüngda mangatettep adokba ajanga tensa mejungi aküm. Iba mapang Agartala nung CPI-M office tem raksatsü aser gari aika rongdoktsü.

Trinamool-i Rajya Sabha MP inyaktsü atema Sushmita Dev shim



Sushmita Dev (File photo)

Guwahati, September 14, 2021

(Agencies): Mongulbarnü Trinamool Congress-i taoba Lok Sabha MP Sushmita Dev nem Rajya Sabha MP inyakdaksütsü shimogo.

"Mamata Banerjee-i tetsürtem tashi itdaksütsü aser politics nung akokba tashi shilem agidaksütsü alizüing yua lir" ta TMC-i sangdong ka nung ashi.

Onoki Sushmita Dev nem Rajya Sabha MP inyakdaksütsü shimogo. Iba ya Mamata-i tetsürtem tashi

itdaksütsü aser politics nung shilem tuluba agidaksütsü atema alizüing ayuba ama inyaker, ta All India Trinamool Congress-i ashi.

Sushmita Dev-i Congress nungi anen aser August 16 nü All India Trinamool Congress nung züngsem aküm.

Sushmita Dev ya Assam Congress lennir aser Bengali lennir asür Santosh Mohan Dev'er jala lir.

Lai Congress ticket amer Silchar menden nung MP inyaka liasü.

Assam CM amokmerenba poster ka angu

Guwahati, September 14, 2021 (Agencies): Assam chief

minister Himanta Biswa Sarma amokmerenba indang poster ka Guwahati kübok Fancy Bazaar area nung madaka aliba angu.

Iba poster nung "Himanta Biswa Sarma kümdangang police Gabbar" ta zülua liasü. Ajsüaka, iba ya shibai zülur yutsü'ar memetet.

Iba poster indang noksatem

social media nung kanga prokshir.

Tawa Assam nung police-i nisung aika khasetba atema tejashi nung nisung kari iba poster zülur yutsüba ama bilemer.

Deobarnü Guwahati police-i Assam chief minister Himanta Biswa Sarma indang taila signature amshiba atema nisung ka apu.

Rs 1.7 crores alangba kozüjang apu

Aizawl, September 14, 2021 (Agencies): Mizoram kübok

Champhai district nung Assam Rifles sepaitemi kozüjang aika puogo.

Sepaitemi Rs 1.7 crores den teimba jenjang kozüjang bosta 780 nung bona lia apu.

"Osang tejangja ka angazükba sülen Assam Rifles

aser Customs Department, Champhai külem telok kati kozüjangji apu" ta Assam Rifles-i metetdaksü.

Kozüjang indang jenjangji Rs 1,70,44,800 indang liasü, ta parnokisa ashi.

Champhai district kübok Khawbung-Zawlsei tesem nung kozüjangji apu.

GOVERNMENT OF NAGALAND DIRECTORATE OF TECHNICAL EDUCATION NAGALAND: KOHIMA NOTIFICATION

NO.DTE/ESTT-2/02/2020-21/ This is to inform all the NSEE-2021-22, selected candidates to undergo Para-Medical, Agri & Allied courses during the academic session 2021-2022, that the last date for submission of REFUSAL LETTER to the office of the undersigned is 17th September, 2021, till 4:00 PM and thereafter, no refusal letter against the stated courses shall be entertained.

Further, the selected candidates are informed to collect the Nomination Letter from the Directorate of Technical Education on 21st September, 2021, from 12:00 noon onwards.

Sd/-
(Nungsangmenlalmchen)
Ex-Officio Director

Issued by DIPR

GOVERNOR'S SECRETARIAT NAGALAND :: KOHIMA NOTIFICATION

Dated Kohima, the 13th September 2021

No. G-14/02-01/00/EDN(Pt III) :: Shri. R.N. Ravi, Honourable Governor of Nagaland, is pleased to institute an Award to encourage the students of Nagaland to excel in the study of Basic Sciences. The Award will be known as "Governor's Excellence Award in Science Study of HSSLC Examination". The Award will be given to the best 6(six) students in science stream with the following subject combination.

- I. Physics, Chemistry & Mathematics (PCM) - 3 Awards
 - 1st - Rs. 1,00,000 (Rupees One lakh)
 - 2nd - Rs. 50,000 (Rupees Fifty thousand)
 - 3rd - Rs. 25,000 (rupees twenty five thousand)
- II. Physics, Chemistry & Biology (PCB) - 3 Awards
 - 1st - Rs. 1,00,000 (Rupees One lakh)
 - 2nd - Rs. 50,000 (Rupees Fifty thousand)
 - 3rd - Rs. 25,000 (rupees twenty five thousand)

The following guidelines shall govern the "Governor's Excellence Award in Science Study of HSSLC Examination":

1. The award will go to the best 6(six) students in order of merit in the HSSLC Examination in science stream conducted by the Nagaland Board of School Education (NBSE) with Physics, Chemistry & Mathematics (PCM) subject combination - 3(three) students and Physics, Chemistry & Biology (PCB) subject combination - 3(three) students.
2. The award will carry a citation and cash prize.
3. Students belong to any Indigenous Scheduled Tribe of Nagaland as notified by the Government from time to time only will be eligible for the award.
4. The students should secure 80% or more in their aggregate to avail the award
5. The student's performance in PCM and PCB will determine the award in each category.
6. The best students in PCM and PCB combination will be selected in order of mark secured and it will be placed as 1st, 2nd and 3rd in each category i.e. students who have opted Mathematics as their main elective subject as PCM category and students who have opted Biology as their main elective subject.
7. The candidate scoring the highest aggregate in Physics, Chemistry & Mathematics (PCM) or Physics, Chemistry & Biology (PCB) will be considered.
8. In case of tie in the marks and aggregate, whosoever secures higher marks in the external marks of PCM or PCB will be considered.
9. In case of another tie, the following norms shall be followed:
 - a. PCB : the marks of Chemistry to be considered first and next the marks of Biology, whichever is higher.
 - b. PCM : the marks of mathematics to be considered first and next the marks of Physics, whichever is higher.
10. In case of further tie, the award will be shared.

(T. MhabemoYanthan) IAS
(Commissioner & Secretary to Governor)



TIR YIMYIM YIMOBILEM (EDITORIAL)

DIMAPUR RASEMNÜ, RONGJUI (SEPTEMBER) 15, 2021

R.N.Ravi tatem o

R.N.Ravi Nagaland nung küm ana governor inyaker aotsüba mapang, pai Nagaland nung tatar yimsüsürtem dang ashiba tesüsaba o kaji, Nagaland nung ochimashi mapatem anema ken o arubatem angadanga tim mapa inyaksü atema Lokayukta mali, ita trok dak tali alitsübaji nübertem ajangzükdaksütsü inyakba mapa kabo masütsü ta ashiba o liasü. Taoba ita Nagaland tatar senden amenba mapang, Nagaland Lokayukta ozüng teraka melenshitsü asoshi latetba ken o magizük ser meyipa yokba mapang pai pa tebilemba ken o ya metetdaksü. Lokayukta tetezü nübertem asoshi ochimashi mapatem anema inyaksü asoshi yimteni tashi agütsüba nisung lir, anungji iba tashiji amer Lokayukta-i pa mesüra la dangi aruba mesüra metetba ochimashi mapa aser ken o ajak agizüka bushisüngdang tenzüktsü. Iba ama yimten tashi aliba nisung ka state shia shimer ayutsübaji linük nung ozüng kuma yangluba teinyaksü mapa ka lir. Ibayongji, Nagaland nunga Nagaland Lokayukta Act, 2017 lateta lir. Atangji, yimten yimsüsürtemi tatar senden nung iba ama Lokayukta ozüng lateta ayuba ya, peisasa pei mapa nung kümdanga inyaksü aser tangartema kümdangdaksütsü nükjidong nung latetba mapa ka lir. Iba tangatetba shisatsü aser mapaji kanga topur tajung aser pei nübertem ochishia tenzüküba shisatsü sayur. Ajisüaka, tia majung Nagaland nung 2017 küm iba Lokayukta ozüng latetba sülen mezüng Lokayukta asütsü shimsang, Justice (Rtd) Uma Nath Singh kümsük kuma tema meinyakteti taküm 2021 küm February nung anentsüsa aküm, anungji Nagaland Lokayukta ozüng nung shia aliba ama ita trok tsüngda, July tashi nungbo pa melena Lokayukta tangar ka shimsüba liasü saka ano kanga tia majung kaji, peii yangluba ozüng peisasa raksaa Nagaland government-i July ita tashi nunga Lokayukta meshimtet aser August ita nungang tatar senden alidang Lokayukta anener temelen shimtsü atema ita trok lateta alibaji küm ka tsüngda shimtsü ta melenshitsü latet. Junger majung kaji, tatar senden nung laletba temzüng ozüng ajak mapa kuma inyaka aotsü atema state nung angh-i mulunga agizüka sign asütsüla. Aji oda, tatar senden nung tatar ajaki mulunga temzüng ozüng ka latetaka, angh-i hau junger ta magizük tashi, iba terenemba ken oji ozüng kuma moutettsü. Nagaland government den taoba angh Ravi, tang taotsü mapang nunga mangatetteptsüsa akümbaji, Nagaland nung ochimashi mapatem anema inyaksü asoshi nisung shimtsüba maparen dak aketba onük nung liasü. Ravii ozüng nung aliba ama ita trok tsüngda tekaratiba nung Lokayukta shimner saka state government-i meilongi küm ka tsüngda shimtsüsa ozüng dena melenshiner. Ana tsüngdaji Nagaland akoksadagi. State nung ochimashi mapatem anema inyaksübaji, tangbo Vigilance Commision dak tashi tulukabo mali, anungji Lokayukta-i dang state nung nübertem tenzükba mapa ajak nung kecha mimshia meinyaki ajaki meteta ochishia inyakdaksütsü atema bushisüngdangtsü tashi agüja lir, anungji tekaratiba nung shimtsü tangatetba nung ano khen iba ken o ya tatar senden nung benoka jembishitsü atema meyipa yoker ta Ravii ashiba o nungji, tatartem dang masü saka asenok ajaki bilemdangtsüsa onük tuluka lir. Nagaland nung Lokayukta mali ita tenet ti alibaji, auer alidak ki tanüker mali lapoka toktsü amai mesüra Nagaland anükertem ajak arütsülen nungi agiener taruner aser touner ajak sademsadema senzüdaksütsüsa Nagaland gate ajaklen lapoka yutsü amai lir. Kasa aueri auyasa asüyonga, kidang tanüker lia auyaba o kenyongi kibur-a aser tanüker a mali sademsadema auyaba naji balala asütsü. Alima asünungji, yimteni ozüng takanga latetyonga aser arogoi sayutsüngiyonga auerbosa alitsü, anungji mauyadaksünüra teti kidang tanüker alitsüla. Nagaland nung tamalen ACAUT teloki anir Lokayukta alitsüla ta akangbaji, Nagaland nung nübertem mapa aser rongsen anüker aser tebushir alitsüla ta akangba nungdak ken o ka liasü aser government-ia aji angateta Lokayukta ozüng yanglua mapa tenzükogo. Ajisüaka, tangbo Lokayukta maliyonga küm kabo ayongayonga onüba shisatsüji tangatet dang, aji tajungbo masü. Atangji, state nung state government dak temababo tashi mali, anungji angh-i ozüng kuma latettsüba ken o magizükteti meyipa yokyonga, ano state government-i kasa terenemba ken o ji angh tasenba nem agütsütsü bilemdar asütsü. Iba ama mapang nung, shitakba agibo, nübertemi ola adoktsüla saka madokerji, joko, angh tasenbaia kechi ashir ta asübajiang Nagaland asoshi tongtibang asütsü.

OLEMSABANG

Khristan Tamang den Sobaliba Liromedem

~ Ayutemjen

(Yashi adok nungi...)

Easter nungi tangazüktsü

Asenoki Yisu asüba aser shia aruba Easter benjong amongba indang Arogo otsü nung reprangdangra: Anglo Saxon nung tsüngrem tenüng "Eastre" liasü ta ashir. Iba tsüngrem yagi tesangwa mesüra metsü tsüngküm tamaittsü sayu (who represented light or spring), anungji parnoki küm shia April ita iba tsüngrem toshiba benjongmong among ta ashir. Iba Eastre ya Babilon aser Assyria nung temeim aser soyapokyaba (love and fertility) tsüngrem Ishtar nungi nungi meyipzükba lir taa ashir. Ano Phoenicia nungeriiba iba ya Baal tsüngrem adianu (sister of Baal) aser la dang Astarte ta aja.

Iba Astarte yimsü ya Europe lima sünga züina aoba mapang 2nd Century C.E. meta Europe anüdoklentip (Northern Europe) len aliba kintem dangi missionarytemi Yisu Osangtajung sangdonga aoba mapang, item kintemi Eastre benjong amongba mapang YISU KHRISTA iba ama mapang ka nung asüba aser shia aruba indang bilemteta aru. Yisu Khrista shia arubajiang Eastre benjong dang nungi tuluba aser tongtibangba, kechiyong ibai tasü madak takok ngur shia aruba lir. Iba yagi Pa dak amanger shia Pa ama shia arutsü ta teimla tulu agütsür. Anungji küm aser anogo ashitsü makok saka iba Eastre benjong nungi Easter melener tanü tashi alijak nung aliba Khristantemi Easter Sunday amonger. Anungji asen sobaliba mera taket benjongmong jagi tematiba Tsüngrem toshia mongtetsüsa Moatsü aser Tsüngremong amongtsü sentong yanglu nung ajungtsü.

Anungji Khristan tajung ka ama asenoki sobaliba benjongmongtem tangatetba nung amongtsü junger ta angateter.

Tekülem/anempong

Asen Aor ya tekülem aser anempong agi dang sünger aliba kin ka ta ashitsü akok. Iba yagi külenbo asenok ya temeshi kin ta ashitsü koka lir. Tatishitsü kar: Kisütsü nung kimong tsüngrem külem, ki süteter meshi tsüngrem külem, among tsüngrem külem, a.a. Item ajak nung anempong dena lir. An rizük nung, ak chanu mepu nung anempong; shiret-kümbang, azük-naro tasen alitsü nung anempong, kikasüchi nungbo küm peyonga anemponga aru. Anungji asen tsürabur Yisu Khrista yimsü magizükdang küm nung anogo teimba ka anemponga dang lia aru. Yongji parnok nungi kika süchir, kenshi-oshir, ochishir adok.

Tanübo asenok tamanger aküm nung item yimsü endokogo. Item tejen tekülemba aser anempongba yimya nungi tajungba aser temaba tekülemba dangi meyip nung tanübo alima dangi atsür oa asenok kecha ashibang aser anempong makai kuma odagi. Tsüngrem O nung Amungnü meshiteta yuang, Ni Temeshi anungji nenok temeshi liang ta ozüng agüja lir. Saka tanü amungnü tekülem ki toktsür shishilempatepba, amungnü kensü-osü/keno balala obendang agitepba senchi chitepba, alima mapa balala bener among adena senzütepba, yimden maparen balala atema mazüngi kümer tekülemi moteti akümba. Item maparen aser inyakyim ajanga Tsüngrem matsüngdang asenok aibeleneritem kuma odagi. Tatsüka masü, temokonga masü, limapura masü tamangera masü ta asen nübur iba tia nung lir.

Anungji tejen tekülemba aser anempong yimya nungi temaba, temecheba aser tarokba nung asen tekülemba ajungkettsüla, asen tekülemba asentenshitsüla.

Sensaksem nungi angazüka benshitsü olong kar

- 1) Sobaliba kümzüka ayutsü nükjidong nung Lai tesayuba anema meinyaktsüla. Yimtitem (Cities) nung akhi inyakba aser amshibatem ajak Museum nung angur, iba ama asen lima jila aser yimtsüngtem nung tetsü tebou mapang amshiba nungo osettem Museum yanglua yutetra Yisu maru tashi tarutsü putu asoshi ibaji tajangzük aketba nungo asütsü. Museum nung ayutsü shir yim nungsa Süngkong tejentem kümzüka yua lir, itemji asenok ajak atema nungo lir. Süngkong malirtemi akhi ama tanü putu nung süngdong tulu bushia meyangluaka Museum nung yutettsüsa nisung 2/3-i ajungshitetsüsa yanglua ayu nunga ajungtsü, kanga tulu menügdak aser kechi südir süka ayutsüla ta masütsüla. (Compulsory menügdak).
- 2) Tetsü-tebou mapang "Tsüki tsüngi" "Arju tsüngi" ajanga koda taküm asüngteta alitsü, koda mapa meranga inyaksü, jayajako shitak ajatsü, ola-angla, sobaliba ken, ilangtsür ken, aser wain-shin balala angazükdakja aru. Tanü iba sayu o kangabo mali. Anungji iba ama tesayuba agütsütetsüsa tesayubatem kaket kuma yanglur Christian Education lesson nung densenma sodi mapang juri lesson kar agira ajungtsü.
- 3) Küm ishika tejaklen Arogo nung tetsürtemi tetsü-tebou kensü nung ken ka atenba (fusion style) aji Tsüngremi mepelar tatok nangzükang ta ashiba otsü lir. Iba tangatetba nungi asenok pilatsüla. Tetsü-tebou kensü nung tekülem ken atenba, tetsü-tebou mapang amshiba kongki ola enoka (Indigenous music) külemba ya tajung lir, iba ama tekülemba yimya angatettsüla.
- 4) Aor ajaki Ao o jembitetsüsa shiri mejembiteter parnokia jembitsüsa ajungshiteptsüla. Parnoki asen o mejembirji ta mesentoktsüla. Ano akok tashi züluyim nung zülumen putepa amshitsüsa ajaki temulung agütsütsüla. Kokra tangar kinia angazüktsüsa leman bushia asen oshi ajungkettsüla.
- 5) Aotsürtem tekülemi Aotsür teberem sü agir ao nung kanga mera akettsü. Iba den hapta nung traditional Thursday ali nung kanga ajungtsü. Küm nung khen anapen temeja sentep ka agia tanur tain ajak pei pei kidong sobutsü agir arua iba telemsa indang lemsatepra kanga tajangzük alitsü.
- 6) Moatsü ama, Tsüngremong ama nung tekülemi pei kin sobutsü sobur arua Tsüngrem külem nung iba jagi Tsüngremi asenok kin ka kümteta yangluba tali jangjadakja Tsüngrem sentsüwangshidaksütsü takoktsü lir.
- 7) Tarutsü kümtem nungbo, asen otsütem tashir malitsü. Israel nung otsübo asenoki temezüng ajak nung janga yur jembir, saka asen otsütema koda? Tamangba yimsü den külemi sobalibaren Israel nungertemi mamadoki belenshia aru aser tanü tashi ibaji taküm kuma ayur. Asenoka koda? Ya bilemdangdi.

Otem

Kechi zülüogo, ibai telemtetba ka masü saka Khristan Tamang den asen Sobaliba Liromedem indang sensaksema lemsatepba nungi kü tangatetba YSS Sabangpur tenüng nung lemsatepa züluba lir. Iba sensaksem zülü ya asen Ao kin Tsüngremi tali meimtsüsa Pai asen nem agütsüba sobaliba tajung mesamadaksütsü asoshi tayongzükba tajungshitep sensaksem o lir. Iba ocet nung kar tagitsüsa lira itemji mapa kuma inyaktettsü tazünger ajak Tsüngremi moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

South Korea nung Arogo tulutiba tenzüksang, Rev. Chosüogo



South Korea yimtiba, Seoul nung aliba Yoido Full Gospel Arogo nung tekülem sentong agiba noksa aser iba Arogo tenzüksang Rev. Cho Yong-gi noksa nung angur.

Seoul (South Korea), Rongjui/September 14 (Agencies): South Korean War sülen linük nung Khristan yimsü ainba nung Rev. Cho Yong-gi-i shilem tulu agia liasü aser tang South Korea nung Arogo tulutibaji pai tentetba Arogo lir.

Rev. Cho arrshi küm 85 lia Mongolbarnü (September 14) süogo. Rev. Cho-i jabaso asem toktsür asü. Bodhbar nungi Arogoi mangyimtsü aser pa den asüpila sentong Honibarnü agitsü.

Cho ya South Korea yimtiba, Seoul nung aliba Yoido Full Gospel Church nung pastor inyaka liasü. Yaküm July ita nung pa tekolok nung azü yimdokba sülen nungi tenzükba Seoul nung aliba hospital ka nung treatment tagidak liasü, ta par Arogoi metetdaksü.

Arogoi sangdong ka ajanga, "Korean War sülen nüburtem tejashi nung aliba mapang ka nung pai Khrista osangtajung prokba ajanga nüburtem nem teimla agütsü. Korea nung Arogo, talisa Yoido Full Gospel Church kanga ainba aser alima nung Arogo tulutiba akümbaji pa ajanga lir," ta metetdaksü.

Bendanglenbo pa dang David Yonggi Cho mesüra Paul Yonggi Cho ta jaa liasü.

1958 küm pai Seoul nung Yoido Full Gospel Arogo

tenzükba mapang nungbo Arogo nung züngsem pongu dang liasü. 1950-53 kümtem nung Korean War sülen linük tanaben asentenshitsü merangba mapang nung pai iba Arogo tenzükba liasü. Pa lenisüba kübok iba Arogo kanga ain aser Khristan yimsü kanga ainba temaitsüji iba Arogo liasü.

1993 küm tashi nung iba Arogo nung züngsem 700,000 dak tema akümba ajanga alima nung Arogo tulutiba küma Guinness World Records yangluteta liasü.

Arogo ketdangsertemi ashiba agi, iba mapang nungjagi tenzükba Arogo züngsem tajemba küma tangbo züngsem 600,000 shi dang lir, anungji tang-a alima nung iba Arogo ya tulutiba asü masüar mejangja saka linük nungbo Arogo tulutiba lir.

Tang tashi South Korea nung Protestant Arogo tulutibaji iba Arogo ya lir. Iba Arogo nung tang pastor aser evangelist 400 shi lir aser bendangleni missionary 500 yoka lir.

Ajisüaka tesüiba küm ishika tsüingda Rev. Cho aser par kibong mangatetep ken o aika nung pungsema liasü.

Pai Arogo senotsü kanga takoksa ngudaksür ta 2017 küm pa aija liasü saka jail nungbo mepuok. 2013 küm nung yimtenren lenir kati par jabaso

ka anema ken o benoka liasü. Par kibong züngsemtemi iba Arogo aser Arogo dak sendakba organization balala nung tongti menden ajak agir ta nisung aikati par kibong aija aruogo.

Rev. Cho ya Arogo nung tongti pastor liasü saka 2008 küm pai iba menden nungi aluba sülen par kinünger masü saka tangar ka nem ang iba menden agütsü. South Korea nungbo Arogo mezüing tenzükba aikati pei chirnurtem nem temaba menden agütsür.

Seoul nung aliba melungtet telok- Christian Alliance For Church Reform nung secretary general, Lee Hunjoo-i, Cho'er Arogo kanga ainba ajanga linük nung tanga Arogotemia peipei Arogo kera aintsü atema merangteper, ta metetdaksü.

"Atangji Rev. Cho-i Korean Arogotem atema mapa tajung aika inyakogo, ajisüaka South Korea nung Arogotemi Arogo tulu akümtsü atema merangtepbaji Cho'er Yoido Full Gospel Church ajanga lir," ta Lee Hunjoo-isa shisem.

2015 sorkar census nung ashiba agi, South Korea nung Protestant nütsüing timba lir, iba sülen Buddhist aser Catholic nütsüing lir. Iba mapang nungji Protestant Khristan nütsüing million 9.7 shi liasü aser ibaji linük nütsüing shilem 20 shi lir.

Evangelical Church of Winning All nung pastor ka leplet

September 14, 2021: Nigeria kübok Kaduna State nung mejangjaba nisungtemi Evangelical Church of Winning All nungi pastor ka leplet aser pa tasü mangji tesülen ang angu.

Asürji Rev. Silas Ali lir ta jangjaogo. Kaduna State kübok Zango Kataf Local Government Area nung aliba Arogo nung pastor Silas Honibarnü Kafanchan-i apusoba sülen Asha-Awuce area anasa kari pa tepseta liasü.

Kaduna State nung Commissioner for Internal Security & Home Affairs, Samuel Aruwan-i pastor tepsetba osang metetdaksü aser security agencies-i

bushisüing dang tenzükogo.

Kaduna State Governor, Nasir El-Rufai-i, iba ya taochi makai tepsetba lir ta shia pastor kibong aser ECWA Arogo den mangyim jashi lemsatepogo.

Pa tepsetertemji tang tashi nungbo mejangja. Tesüiba küm aika Nigeria kübok Middle Belt nung Islamic kiralongrartem aser Fulani teloki Khristan meyrjang aika tepsetogo.

Taküm July ita nung International Society for Civil Liberties & Rule of Law (Intersociety) teloki, tesüiba anogo 200 tsüingda Khristan 3,462 tepsetogo aser Khristan 3,000 shi puer ogo; iba dak alia Arogo 300 aser putir 10 anema inyakogo, ta metetdakja liasü.

Africa nung nütsüing timba aliba linük-Nigeria ya alima nung Khristantem tamajungba reshikangshiba linüktemrongnung jenjang 9buba nung lir.

2021 küm tetenzüklen nungi tenzükba West Africa nung Jihad telok balalai Khristantem anema inyakba kanga bulua kümogo aser region nung linük tamajungtibaji Nigeria lir, ta International Christian Concern-i metetdaksü.

Ano külen Global Terrorism Index nunga kiralongra agi tamajungtiba kongshiba linüktemrongnung Nigeria ya jenjang 3buba nung lir. 2001 küm nungi 2019 küm tashi nung Nigeria nung kiralongra ajanga nisung 22,000 dak tema süogo.

ANO GO ABEN TSÜNGREM DEN

Temsüa jajaang

... , koba ajaba agi nenok ajak, iba ajaba temsüa jajatsü, Ni, Kibuba nung tepuokbai nenok dang mepishir. Efesa 4:1-3

Pauli Efesa 1-3 nung Khristan tesayuba aser Khrista nung tamanger ka jenjang indang jembi. Tang iba tapu nung tamanger mapa aser yimya lemsateptsü indang jembi. Pai pasasa Khrista nung tepuoker ka ta jembi aser tesem kar Tsüngrem aser Khrista asoshi talenba kilir taaka amshir. Pai tamang katetta aser tashi angaa Yisu sülen anidaksüba tasak ta metetdaksünü saka parnok tajaba temsüa jajatsü Pai ayongzük. Tamanger tekümtet dangi ajaba nung Tsüngremi taochi talubusa sayu (Yn. 15:16), parnok tetemsü ta masü, saka tamangertemi temsüa jajaba agi Pai aochiba sayutsüla.

Pauli asenoki anogo shia jajatsüba meraji tanü asenok dang sayur. Yisu jajaba ama jajaba, Yisui bilemba ama bilemba aser Yisui jembiba ama jembiba ajanga asenoki temsüa jajaba sayur. Kibubai asenok dak kongshia tasüing dangba ka asüing dang aser ibaji asenok ajaki langzüksüla. "Kechiba nenoki Kü dang Kibuba, Kibuba ta ajar, aser Ni ashiba meinyaker?" (Lk. 6:46). Asenoki kechi inyaksüla Pai shia lir.

Nai Kibuba ne Tsüngrem meimang, aser ne kiyonger meimang. Pai asenok tali tayongzükba agütsür: "Kü dang Kibuba, Kibuba ta ajar shiai kotak yimli-i aitsü masü, saka shibai kotak nung aliba Kü Bui mulungba ama inyakdir pa aitsü" (Matt. 7:21). Asenoki tejembidang mejembi, tejajaa jajatsüla; temsüa jajatsüla.

Tsüngrem, tanü Nai kü o tem aser mapatem anüksü ni Ne dang mepishir.

Pope-i Slovakia nung Khristan lenirtem longjema alitsü ayongzük



September 12, 2021 nü Milan Rastislav Stefanik International airport nung tetsür kati sobaliba sübotsü sübor Pope Francis agizükba noksa nung angur.

September 14, 2021: Pope Francis-i Slovakia anogo asemnü semdang; September 12 nü pa Bratislava international airport tonga aruba mapang nung linük Tir den Yihuda aser Roma nung noklang aikati pa agizüksü atema airport nung adenshia liasü.

Pope Francis tayimtsü nungi ayazüka aluba mapang nung nisung noklang aikati Slovakia nung sobaliba sübotsü sübor wako temesüing aser wakong sentsü ayipshia pa agizüka liasü.

Khristan lenirtem den jembidang pai, "Asenoki asen ajangzüksü atema dang masü saka ajak ajangzüksü atema inyaksüla. Asen adianutem nüchiba tia angubaji asenok atema-a nüchiba tia lir. Asen adianutemi nüchi tia mengura iba jagi asenoka mabensar," ta pai ashi.

"Asenok Khrista nung tera yanga meliaka Europe-i Khristan tera tanaben

bushitetsü, ta asenoki meimlatsüla. Asenok longjema melira mesüra asenoki tangar atema mebilemstüra asenoki Europe nung osangtajung meproktetsü," ta pai ashi.

Iba senden nungji Czech aser Slovak Republics nung Orthodox Arogo tongti, Metropolitan Rastislav, Slovakia nung Ecumenical Council of Churches Tir, Ivan Elko aser Central Union of Jewish Religious Communities Tir, Richard Duda nungera densema liasü.

Senden tembangba sülen Pope Francis-i Slovakia nung Jesuits lenirtem ajuru.

September 13 nüa pai Slovakia nung Yihuda nung lenirtem, Catholic lenirtem aser sorkar lenirtem ajurua liasü.

September 14 nü pa Košice & Prešov-i oa Roma nung aser lanurtem ajuruba den külemi Byzantine Catholics den senden amen. September 15 nü pa Rome-i meyipa aotsü.



OFFICE OF THE LION'S CLUB (SANGPU) LONGSA VILLAGE MOKOKCHUNG 798601, NAGALAND

B. Limawati-er jaboso Sp.Longtsükümba Longsa, pai Mixed Martial Arts GAMMAAsian Championship Kyrgyzstan nung India tenüng nungi asayaba "SILVER MEDAL" ngutetta Longsa nung, Naga nung aser India lima nem konang nüngsang tulu bener arutsüba asoshi Lion's Club Longsa Office ajanga alima dang pelaba sangdonger.

Iba takok ya tetenzüker sür tarutsü anogotem nunga Tsüngrem tatenba nung takok tulu angutsü Club sangertemi sarasadema atar.

Sd/-
Nungsangoba
President

Sd/-
Limatemshi
General Secretary



PM Modi taruba hopta Quad summit nung shilem agitsü

New Delhi, Rongjui/ September 14 (Agencies): Ato Kilonser Narendra Modi-i September 24 nü tang mezüngbuba Quad lenirtem tejak o tejak na chitepba senden amenba nung shilem agitsü. Iba senden ya US nung amentsü kong tir Joe Biden, Australia PM Scott Morrison aser Japan PM Yoshihide Suga nungeria shilem agitsü.

Indo-Pacific tesem nung China kanga tashi ita akümba mapang ka nung iba senden amentsü.

Senden nung lenirtemi, March ita 12 nü mezüngbuba virtual summit amenba sülen terenloktem lepa reprangshitsü aser arok tejangrabatem dak sendakba nung onük balala benoka sensak asemtsü imlar, ta sorkar sangdong ka ajanga metetdaksü.

Covid-19 wara azüoktsü

asoshi tang maparen balala benoka inyaka aliba nung shilem ka ama parnoki Quad vaccine initiative asadangshitsü, koba taküm March ita sangdonga liasü.

"Parnoki tang alima nung ken o tem; critical aser emerging technologies, connectivity aser infrastructure, cyber security, maritime security, humanitarian assistance/disaster relief, tzümopung melenshiba aser education amala onüktem dak sendakba nung pei tebilemba lemsateptsü. Iba senden ajanga lenirtem nem Indo-Pacific tesem nung sadem sadema inyaksangshitsü atema parnok tejangraba aliba indang sensak asemtsü atema maangka agütsütsü," ta kasa sangdong ajanga metetdaksü.

PM Modi-i 2019 küm September ita US semdangogo aser iba mapang taoba tir

Donald Trump-i 'Howdy, Modi' sentong ayongzükja liasü.

PM Modi-i March ita Bangladesh semdangba sülen taküm tang agi tanabenbuba bendanger linük ka semdangtsü.

March ita Tir Biden-i ayongzükja Quad lenirtem virtual senden ka menogo. Iba senden nung parnoki Indo-Pacific tesem nung sadem sadema inyaksangshitsü atema inyaksü telemteba agi aser iba ajanga China nem osang tejangja ka agütsüogo.

2017 küm November ita India, Japan, US aser Australia-i Quad tentetsü atema asatapa liasü.

Kasa mapang nung PM Modi-i US semdangba mapang September 25 nü New York nung 76buba United Nations General Assembly (UNGA) Session general debate nung o jembitsü renema lir.

TMC-i Rajya Sabha atema Sushmita Dev nominate asü

New Delhi, Rongjui/ September 14 (Agencies): Tawa Congress toktsür Mamata Banerjee-i aniba party nung adenla Sushmita Dev, Rajya Sabha atema Trinamool Congress-i Mongolbarnü nominate süogo.

Sushmita Dev nominate asüba osang ya Trinamool Congress-i Twitter ajanga sangdonga liasü. "Mamata Banerjee-i tetsürtem nem tashi tali agüja yimden yimsüsüba nung takok tashi shilem agidaktsütsü nükjidong aliba ajanga lokti tali ajangzüktsü atema asen lokti nem teyari

agütsütsü," ta TMC-i tweet asü. Trinamool Congress-i, Assam aser Tripura nung party inyakyim achaayangtsü atema Sushmita Dev nem nongloktsüogo.

Sushmita Dev ya taoba mapang Congress party national otongdar aser party tetsür wing tir liasü aser la August ita TMC lenir Abhishek Banerjee aser Derek O'Brien na matsüingda Kolkata nung Trinamool Congress nung aden.

Assam kübok Silchar nungi taoba MP ya Congress den küm semer dak tema sendaktepa aruogo. Lai TMC nung maden

tsüingda Congress tir Sonia Gandhi nem lai party toktsüba shiti agüja liasü.

Sushmita Dev-i, lai party toktsüba indang kuli kecha magütsü, saka yimden yimsüsüba tsütsü mongintemi taküm Assam election mapang Dev aser iba mapang APCC tir Ripun Bora na Barak Valley nung menden telemsa dak sendakba nung mangatettep adoka la nem shilem magidaktsüba ya kuli ka asütsü ta bilemer.

Lai state assembly election mapang APCC-i la nem tim akhümsüba magütsü, ta ashi.

BJP-i Mamata indang nomination ashishi

Kolkata, Rongjui/ September 14 (Agencies): West Bengal chief minister Mamata Banerjee-i la anema Assam nung ken o bangdak aliba mesangdongba atema lai nomination file asüba anema Bharatiya Janata Party (BJP)-i ola adokogo.

Bhabanipur assembly menden atema by-election September 30 nü agitsü lateta lir. Ita ishika tejakdang tembangba election nung Banerjee, Nandigram nungi tamakok anguba sülen iba election nung tokteptsü. BJP-i la den tokteptsü atema Priyanka Tibrewal shimogo.

Mongolbarnü Tibrewal indang chief election agent Sajal Ghosh-i, constituency indang returning officer nem tashishiba agütsüogo. Pai ashiba agi, Banerjee-i la anema ken o pongu benoka aliba mesangdong.

Shiti nung, banerjee anema Geeta Nagar, Pan Bazaar, Jagiroad, North Lakhimpur aser Udharbond ta Assam

police stations pongu nung ken o bangdaka lir, ta shia lir.

Kolkata nung Election Commission of India ketdangsürtemi iba tashishiba dak sendakba nung kecha telangzüba magütsü aser ashiba agi, iba ken o parnok ket tonga maru.


Ajisüaka BJP lenir Suwendu Adhikari-i, kasa ken o tetshia Banerjee aitsüogo.

Nandigram indang returning officer dangi shiti ka nung Adhikari-i, chief minister-i la indang nomination papers nung Assam Police aser CBI ket nung la anema ken o alibatem indang mesangdong, ta ashi.

CBI ketdangsür kati, ken o nung aija lila ya tangar ka aser TMC tekolakba masü ta shiogo.

EC-i iba election nung tokteptsü atema banerjee nem temelaba agütsüogo. West Bengal nung TMC-i election nung takok tulu angu saka Banerjee-i Adhikari constituency nungi takok mongutet.

Regional oshi ajak ajungkettsüla: HM Shah



New Delhi, Rongjui/ September 14 (Agencies): Union Home Minister Amit Shah-i Mongolbarnü, Hindi oshi ya India nung tanga regional oshitem tembar lir aser item oshi ajak ya jungkettsüla aser jembitsü atema ajushitsüla, ta ashi. Hindi Diwas amungba anogo sentong ka nung o jembiba mapang pai, tsürapurtem dang pei tanurtem English medium school tem nung azünger süaka parnok den kidang pei tetsü oshi nung jembitsü mepeshia liasü.

Ajita mesera tajurtem pei tera nungi pilaa aotsü, ta pai ashi. Hindi ya tanga regional oshi dang nungi balaka masü. Hindi ya India nung regional oshitem ajak tembar lir, ta pai ashi. Shah-i ashiba agi, India nung oshitem yagi Hindi abensatsür aser regional oshi ajak ya ajungkettsüla aser jembitsü ajungshitsüla.

2014 küm nungi MP tem aikati Parliament nunga pei oshi agi jembir aser parnoki jembiba o tem ya English aser Hindi oshi-i meyiper ta pai ashiba den iba ajanga nüburtem tenüng

nung nokdakertemi parnok tesem nung tebilemtsü alibatem tajungba rasaa shiteter, ta ashi. Home minister-isa, nüburtem ya osettsüt adokdaksüba nung dang tangar dak memetaloki aliba masü saka oshi nunga kasaji asütsüla, ta ashi.

Paisa, PM Modi-i pa tebilemba kanga junga lemsateptsü atema international jenjang ajak nung Hindi agi jembiba tatishitsü bener arua jembiba. Modi-i benokba New Education Policy (NEP) tetshia Shah-i, iba policy kübok regional aser Hindi oshi ajungkettsü atema provision tem lir, ta ashi.

Covid wara azüokba dak sendakba nung pai, India nung central aser state sorkar tem longjemer inyakba aser nütsünyongsük crore 130-i teka amteper inyakba ajanga teraksatsüba tulu madoki wara azüoktetogo, ta ashi. Ato Kilonseri stakeholder, doctor, mongintem aser tangar den jembiba mapang Hindi oshi nung dang jembir aser iba ajanga teküokba jenjang tashi osang jangja jangja tonga aoer, ta pai ashi.



India nung gari totzü aser LPG jenjang maneni atuba anema Bodhbarnü Bengaluru nung Congress Party nung inyakeritemi yimyim ayima longkak aitba noksa nung angur.

England nung arishi kum 12-15 tsungdapur COVID vaccines agitsü

London, Rongjui/September 14 (Agencies): Vaccine agiba ajanga kaketshisatsü bushiba nung tetsükdaksü adokbatem bentettsü ta medical adviser temi ashiba sülen England nung arishi kum 12 nungi 15 tsungda alirtem nem COVID-19 vaccine agitsü maongka agütsü. United Kingdom kübok linük pezüprongla nungi Chief Medical Officers (CMOs) temi vaccine agidaksü atema benokba sülen British sorkari tanur arishi kum 12 nungi 15 tsungda alir ajak nem vaccine agütsü telemtetba agiogo.

"Arishi kum 12 nungi 15 tsungda alirtem nem Covid-19 vaccine agüja parnok tashidak nung kumzükba den school nung tashidak menatepa aoba nokdangtsü aser tanurtem classroom nung

angazükdaksü atema vaccine agütsüba sentong atsülangshitsü asoshi Chief Medical Officers-i benokba ni agizükogo," ta health minister Sajid Javid-i ashi.

England nung vaccine taruba hopta nungi agütsü aser Scotland, Wales aser Northern Ireland nunga pei linük CMO tetuyuba dak ajemdaker vaccine agütsü.

CMO temi Britain nung tanur arishi kum 12 nungi 15 tsungda alirtem nem Pfizer-BioNTech vaccine mezüngbuba shot agütsü tuyuogo. Iba ita tetenzüklen Joint Committee on Vaccination and Immunisation (JCVI)-i vaccine magidaksü atema telemtetba agiba sülen tang iba jenjang agiogo.

United States, Israel aser Europe nung linük kar nung

tanurtem nem vaccine agütsü tenzükogo aser iba ajanga item linüktem sülen anidaksü atema British sorkar nongshia arudar.

Britain nung tang tashi nung COVID-19 tashidak agi nisung 134,000 dak tema süogo. Vaccine agütsüba sentong kanga kara tenzükba sülen tang meylongi kümer lir.

CMO temi shiti ka ajanga ashiba agi, tanurtem nem vaccine agütsüba ajanga COVID-19 tashidak menatepyonga aoba tajemba kümdaksü aser iba ajanga school nunga minprong masütsü.

CMO temisa taruba kum matong tashi item tanurtem nem vaccine tanabuba dose magütsü atatsü kechiyong alima ajunga nung data asadangtsü atema parnoki atatsü, ta ashi.

Southeast China nung COVID-19 cases anasü dang tali lir

Beijing, Rongjui/Sept. 14 (Agencies): China southeastern tsütsü Fujian province nung COVID-19 tashidak anasü dang tali lir ta health ketdangsürtemi Mongulbarnü ashiba sülen iba virus prokshia aoba anendaksü mechi ketdangsürtemi tenokdangba tasen agütsü.

National Health Commission ajanga ashiba agi, September 13 nü iba tesem nung coronavirus tashidak nisung 59 dak putet, kong September 12 nü nisung 22 dak puteta liasü. Ajak ya Fujian nung lir, koba north tsütsü Zhejiang aser south tsütsü Guangdong den arütsüa lir.

Anogo pezü kisung nung Xiamen densema Fujian yimti asem nung community infections 102 liasü. Xiamen ya tourist aser transport atema tongtipang yimti la lir, kong nütsung yongsük million pongu alir. October 1 nungi tenzük

hopta junga National Day sodi anogo angutsü lia iba osang ya sangdonger.

Fujian nung iba tashidak ya nütsung yongsük million 3.2 aliba Putian yimti nung tenzük, kong September 10 nü mezüngbuba case jangjateta liasü. Putian nung putetba COVID-19 tashidak ya kanga kera menatepa aoba Delta variant liasü.

Tangbo south tsütsü Xiamen nunga iba tashidak ya pokloka oa September 13 nü cases 32 liasü, kong September 12 nü nisung ka dak puteta liasü.

Putian nung ama Xiamen nunga tesem kar nung lockdown benok, kindergartens, primary school aser high school nung offline class anendaksü, nüburtem sentepa kazüba tesemtem, gyms aser bar shibang aser yangji alirtem dang tongtipang masüba nungbo yimti yutsür maotsü ashi.

Xiamen nung COVID-19

cases mezüngbuba ya Putian nung aliba case ka den ajurutepa liasü, ta Xiamen ketdangsürtemi Hombar aonung ashi. Xiamen nung tsüngsang ajungba ajanga raliwalir temi iba tesem kanga sabur. Xiamen Gaoqi International Airport ya kanga tongtipang tesem ka lir, koba Yangtze aser Pearl River Delta den sendakteper.

Xiamen nungi aoba aser iba tesemi aoba tayimtsü shilem 60 shi Mongulbarnü thinena liasü, ta sangdong ka ajanga ashi.

Mongulbarnü nungi tenzük Putian aser Xiamen yimitem nung coronavirus tashidak tesem ajunga nung tendanger. Ajisüaka China nung 2020 tetenzüklen amabo tenokdangba tesashi magütsü. Anasa aliba Quanzhou yimti nunga community transmission cases asem liasü.

Quanzhou nunga tayimtsü shilem 70 shi athi, ta Variflight data ajanga sayu.

Moscow nung Putin aser Assad sensakasem aka

Damascus, Rongjui/September 14 (Agencies): Russia tir Vladimir Putin aser Syria tir Bashar Assad na Moscow nung linük ana army tesendaktep aser Syria nung telungpurtemi amokbanger aliba tesemtem azüoktsü atema tasatem sensaksemogo, ta Damascus nung state media sangdong ajanga Mongolbarnü metetdaksü.

Taoba kum January ita Syria yimtiba nung senden ka amenba sülen tir ana tang mezüngbuba ajurutepa sensaksemogo. Syrian state TV-i, tir ana tsungda mapang talangka intoka sensak asemba metetdaksü saka tena sensaksem indang osang

tejangja magütsü. State TV sangdong ajanga ashiba agi, iba senden nung kiralongrar anema raraba mapang linük ana tsungda tesendaktepa indang sensak asemtsü atema Syria foreign minister aser Russia defense minister nata dena liasü.

Putin o Assad nati ano rara agi raksatsür aliba linük nung yimden yimsüsüba dak sendakba nung inyakim indang onüka benoka sensaksemogo, ta kasa sangdong ajanga metetdaksü.

Syria nung mepetmesü adoker aliba atema teyari agütsü asoshi Russia 2015 kum rara nung aden aser iba ajanga Assad nem tashi tali

agütsü aser tang Assad-i aniba sepaitemi linük nung tesem timba amokbanger lir. Syria nung Russia nung sepai noklang aika yoka lir aser Syria kübok Mediterranean tzüküm nunga military air base ka amenoka lir.

"Kiralongrar den raratsü longjemba sülen kum trok lir ni nü den Moscow nung ajurutepa atema kanga pelar," ta Assad-i ashiba Syrian TV sangdong ka ajanga metetdaksü.

Hopta tsungda Syria nung opposition activists temi ashiba agi, Russia nung rara dang amshiba tayimtsütemi Idlib province maka arudar, koba telungpurtem tamendakdak tatembangbuba lir.

Pelaba Lemsateper

Onoki teti meima aliba Asür Mrs. SANGYUJENLA JAMIRALONGCHEN, la iba lima nungi pilar onok mangyim jashi tia nung alidang kija aser lokti shirnokisa ozü dang temeim mapa tajung sayuogo, nenok ajak dang kangasa pelaba lemsateper.

Nenok mapa tajung asoshi Teyanglur Tsüngremi maneni moajangma ta ozü tamang sarasadem.

Temeim kinungertem



1928 - 5th Sept 2021

MULUNGNEN O



ASO: 28 August 1928

ASÜ: 05 Sept. 2021

Asür Lepdensangla Imchen (Mangmetong)

Onoki teti meima aliba ojala Assür Lepdensangla shiranga aliba mapang nugi tasünü tashi kiyong-kidanger aser medemsor kwikati rongsen aser tamang sarasadem agi ozü den yaritepogo kangasa pelar. Tsüngremi nenok mapa tajung asoshi maneni moajangma ta ozü sarasadem.

- Temeim Chirnurtem, Semchirtem aser Kinungertem.

MEYIBA AGIR

Dated 24/08/21 anogo nung kena (S. Mar Aier & Walter Longchar)-i ASTD office dangi zuluba shity nung anogo 7 (tenet) tsungda osang kaket nung ASTD-i aibelena prokshia alibaji adoktsü asoshi ozüng süa züluba, aser ano iba dak sendakba ken o nung print media nung kenati ASTD-i maginütsüsa kechisa adokogo, item ajakji kenati tai ta angateta meyiba agir aser ASTD office tsungdang tatok meshir.

Nenok den külem tenzük

S. Mar Aier

Walter Longchar

Taoba Afghan VP kidang nungi sen million \$6.5 den hon ngutet: Taliban

Kabul, Rongjui/Sept. 14 (Agencies): Taoba Afghanistan tatong tir Amrullah Saleh'er ki mita bushiba mapang sen million \$6.5 aser hon telong 18 ngutet, ta Taliban temi ashir. Parnoki iba osang ya Twitter nung sangdong aser yangji aliba osangbener temia suitcase ana nung sen aser hon long tsünga aliba video ka prokshia liasü.

Anogo ishika tejakdang Taliban-i Amrullah Saleh adianu Rohullah tepset, ta ashir. Pa ya Taliban telok anema nokdaker aliba tesem tatembangba, Panjshir nung raraba mapang tepset, ta ashir.

Panjshir nung Taliban aser Northern Resistance Front tsüngta raraba tali tesashiba akumba osang prokshia lia Amrullah Saleh adianu Rohullah Azizi asüba osang ya Hokulbarnü sangdonga liasü.

Ajisüaka Amrullah Saleh aser Northern Resistance Force lenir Ahmad Massoud na kong aliar ano mejangja.

Taoba ita US-i yariba sorkar laoba sülen Taliban-i Afghanistan amokbanga liasü. US-i

kiralongrar telok ta tenüng agüja aliba Taliban yagi August 15 nü tir aliba ki atüngdoka liasü.

Taoba ita manger-mesangwa tsüngta Taliban-i Afghanistan amokbanger sorkar sangdongba sülen September 7 nü par cabinet sangdonga liasü.

Iba 'acting' government ya Mullah Mohammad Hassan-i anitsü, ta odongtar Zabihullah Mujahid-i Kabul nungi osangbener senden ka nung ashi. Iba Islamist telok nung lenir Abdul Ghani Baradar ya pa indang deputy shim.

Lenirtem rongnung Khairullah Khairkha dena lir, shiba Afghanistan indang information minister ka ama inyaktsü, Mullah Yaqoob ya defence minister aser Amir Mutaqqi ya foreign minister ka ama inyaktsü.

Afghanistan yimsüsürtem rongnung Taliban masüba nübu kata shimoka mali, koba linük balalai meshia liasü. Ajidang masü, parnoki sorkar lenitsü shimba nung tetsür kata shima mali.

Longleng nung Cooperative Marketing Pickup Van tenzüksüogo

Longleng, Rongjui/September 14, 2021 (TYO): Hombarnü (13.09.2021), Longleng DC Office kima nung, Assistant Register of Cooperative Societies (ARCS) Longleng indang office ajanga Cooperative Marketing Pickup Van tenzüksüoba sentong agia liasü, ta sangdong ajanga metetdaksü.

Integrated Cooperative Development Project (ICDP) 2020-2021 kübok item Pickup Van atema senotsü teyari agütsü aser sentong nung Deputy Commissioner &

Chairman DLCC, ICDP Longleng, M.Shayung Phom alakteta tejaoker ama aruagi aden.

Yimtsüng nung alir aluyimertem, parnok r o n g s e k e t t s ü n g ajungkettsütsü nükjidong nung nungdakba senotsü teyari agütsüba atema, DC-i Department dang pelaba metetdaksü.

Shayung Phom-isa, tajangzük angur lokti dang item gari tajungtiba nung amshitsü aser mapang shitak nung loan meyiptsütsü; aser iba den külemi lokti tejakleni aotsü aser

maparen takok angutsü asoshi meranga inyaksüla, ta tetuyuba agüja liasü.

Tarutsü nunga tanga teloktep tentet balala atema tatishitsü asütsüsa ochishia inyaksüla, ta paisa ashi.

Pickup truck angur telok temji Yachem village Integrated Multipurpose Cooperative Society Ltd aser Mongtikang Village Integrated Multipurpose Cooperative Society Ltd asütsü. Iba sentong nung I.Chume Chang (DRCS) Longleng menden liasü, ta kasa sangdong ajanga metetdaksü.

RD kübok PD aser BDO atema orientation training agiogo

Kohima, Rongjui/September 14, 2021 (TYO): Mongolbarnü, RD Conference Hall nung Rural Development Department kübok Project Directors aser Block Development Ketdangsürtem atema "People's Plan Campaign-2021" for "Village Development Plan 2022-23" nung anogo ka orientation

training agüja liasü, ta sangdong ajanga metetdaksü.

RD, Commissioner & Secretary, Neposo Theluo-i, PPC indang asalentongtem junga angatetsü aser GPDP renemtsü; aser terenlok asoshi asalentong timi yanglutsü tongtibangtem nung ajemdaker jemi, kechiyong iba ya Ministry of Panchayati Raj, GOI indang tetuyuba lir, ta pai ashi.

Tawa agiba senden nung HOD's ajak medema aruagi adenba indang yimdangi arua, Nagaland Chief Secretary-i, iba campaign takok angutsü asoshi department temi nendaka inyakba maparen sayur, ta ashi; aser tarutsü nunga terenlok asoshi asalentong tajungtem lemsateptsü asoshi imlaa atar, ta pai lemsatep.

Theluo-isa, tesendaktep tajung adokdaksütsüsa district level nung senden ayongzüksü atema pei pei tata district nung Deputy Commissioner ajurutepa aser tebilemba tem lemsateptsüla

ta PD's ajak dang mepishia liasü.

GPDP renemtsü atema yimtsüng shia nung GPDP Facilitation Team amenoktsü kanga dang tongtibang, ta paisa metetdaksü.

Iba sentong nung, Member secretary, Panel of Review of Communitisation of Public Institutions & Services Act, John Lohe-i, Communitisation of Public Institutions & Services Act 2002 atema tasüngdangba nung ajemdaker powerpoint presentation agütsü. Kasa mapang BMMU, Jakhama Block, Sokhrienuo Rupre-o-i 'Village Poverty Reduction Plan' nung jembia liasü.

Sr. Faculty, SIRD, Juthsutho Phoji and RDO, Vilopi Sakhrie-i "People's Plan Campaign-2021" and "Village Development Plan 2022-23" nung jemiogo.

Iba sentong tembanga K. Neibou Sekhose, Jt. Director & SNO, GPDP-i tepela anküp o jemi, ta kasa sangdong nung shia lir.

Phek DPDB senden agiogo

Phek, Rongjui/September 14, 2021 (TYO): Mongolbarnü, DPDB Conference Hall nung, September 2021' ita atema Phek District Planning Board (DPDB) senden ayonga agiogo. DC & Vice Chairman DPDB Phek, Razouvolie Dozo-i anir iba senden agia liasü, ta sangdong ajanga metetdaksü.

Iba senden nung, DC-i taoba ita senden nung lemtetbatem asadangshia jemi aser teloki Chozuba Town nung College ka lapoktsü asoshi olemtepogo, koba tekolakpur (higher authority) dangi iba asalentong benoktsü asoshi Board-i agizüka liasü.

Maneni, iba senden nung, National Tobacco Control Cell (NTCC), Dr.Lichukholie-i DPDB züngsemtem dang 'smoke free campaign' indang mapatongtem metetdakja liasü. Iba sülen, Department of Horticulture, Senkalemba-i power point ajanga departmental inyakyimtem telok dang metetdaksü, ta kasa sangdong nung shia lir.

MULUNGNEN O



ASO : 15/8/1936

ASÜ : 10/9/2021

Asür Tsüktikümla (Mongsenyimti Compound)

Onoki teti meima aser akhüm tetushi agüja aliba ozü tsürabur Ojala, Tsüktikümla, ajungbena iba akhümlü tempanga ozü mulung animesüngzükte amang milen züksep ama alidang onok nem tesüngzük agüja sensosanger, anükapang, kiyonger, lokti balala aser bendang balala nungi arua shirnokisa sarasadem, shisatsü aser ali rongsen agi yaritepogo, nenok ajak dang ozü mulungjang taroktiba agi pelaba lemsateper. Teyanglur Tsüngremi nenok kija kibongtem ajak molamoshia moajangma ta onok sarasadem.

Temeim Chirnur & Semchirtem.

Mulungnen O



Oct 1940 - 9th Sept. 2021

Onoki teti meima aliba asür Mrs. Mendangsangla (Changtongya) akümüli wadang tembanger tebu Tsüngrem dangi aoba anogo nungi tang tashi ozü asüko lemsatepba kinunger, medemer, lokti tentet balala aser Arogotem shirnoki nübu mapang den rongsen jenti agi ozü mulung sünüpja yariba mulungnen o den tepelaba lemsateper. Tsüngremi nenok ajak moajang.

Temeim kinungbo, chirnur, semchir aser sosem dangsem.

Office of the
LANGPANGKONG TZÜKONG MUNG DANG
H.Q. Chuchuyimlang - 798614
Dist. Mokokchung, Nagaland
ESTD. 1933
LTM-I SANGDONGER

Langpangkong Tzükong Mungdang (LTM) Inti mungdang asoshi nungdak jenti jembitsü alinung September 17, 2021 anogo 11:00 ako nungi tenzüka LTM salang Chuchuyimlang senden ka amentsü sangdonger. Anungji tzükong sapang nung yakpang süa alirtem ajak iba senden nung adentsü metetdaksür.

Sd/-
M. ZULU Ozüküm)
President

Sd/-
Watitoshi Jamir
Asst. Gen. Secy.

VACCINE-I NOKDANGER, VACCINE-I KÜMZÜKER!!

DEPARTMENT OF HEALTH & FAMILY WELFARE GOVERNMENT OF NAGALAND

"Ajak dang Covid-19 vaccine agütsü asoshi onoki mepishir, kechiyong asenok akhi taküm libaliro dangi meyiptsü asoshi ibaji dang lenmang. Covid-19 vaccine agütsü asoshi tsüba malitsü ajak dang onoki mepishir." - Wb. Senkameren (Küm 82) aser Wt. Meratula (Küm 81). Wt. Meratula ya stroke sür küm 11 buba. May 2021 nung tenapronglai Covid-19 vaccine dose tanabuba agiogo.

"Mapang kabo, nüburtemi Vaccine ka mesüra Taneptsü asoshi imlaa aser sarasadema liasü. Tanü, asenoki vaccine angur, ajiasünung asenoki tamang kadi. TANGAR kar indang TAMANG nung masü, TSÜNGREM dak asen TAMANG yur lidi. TAMANG aser OCHI na külemi aotsü atema tangba MAPANG ya lir ta bilemba yong, ni vaccine agi." - Wt. N. Atila Ao (küm 58), Retired Govt. Servant, lai Covid-19 vaccine dose anaprongla agiogo.

"Temang nung timtem balala alirtem aser Covid-19 vaccine agütsü atsuayonga alirtem dang, atsuayonga malitsü aser nü sasa na küzmüksü, nai meimertem aser lokti küzmüka ayutsü asoshi, ajaki vaccine agütsü ni ayongzükter. Tekümdangtsü Mezüng." - Wb. Chubakumba Chang (küm 62), Rtd. Jr. Farm Manager, AH&VS. Chubakumba ya diabetes patient ka aser pai Covid-19 vaccine dose anaprongla agiogo.

"KIDANG KAZÜANG", Campaign, Picnic aser Party tem kongia maoer, saka nai tangalen senzünüra, na aser meküta alirtem küzmüka ayutsü asoshi tamasa Covid-19 tendangang mesüra vaccine agiadokang." - Wb. Thejakhrietuo Kire (küm 35), Certified Personal Fitness Trainer, Covid-19 vaccine dose anaprongla agiogo.

"Ni Covid-19 vaccine dak tamang akar. Ni vaccine dose anaprongla agiogo, kechiyong vaccine agiba ajanga ni dang masü, saka külem nüburtem küzmüka yutsür." - Wt. C. Chemla Phom (küm 38), Associate Pastor (Women), Bhumnyu Baptist Church.

"Tanü Covid-19, ashiko asüngbo tanga tashidak/wara ka adoktsü akok. Anungji, Doctor aser Vaccine dak Tamang kadi. Alima ajunga asüngba wara koktettsü asoshi ibaji dang lenmang lir." - Wt. Nyiamjai Phom (küm 80), Stroke aser Hypertension patient, Covid-19 vaccine dose anaprongla agiogo.

"Ni atema, Na atema, Ajak atema. Ajak lemsatepba khuret ka." - Kr. Lothunglo Z Ezung (küm 26), la Covid-19 vaccine dose tanabuba agütsü atema atadar.

NAGALAND Daily State Help line No. 1800-345-0019
AGAINST National Toll Free No. 1075
COVID-19 For any queries on COVID-19 and other health issues.

FOLLOW US
@DHPW Nagaland
dohfw_nagaland
dohfw_nagaland
@HealthNagaland

*** Tajungtiba küzmüka alitsü asoshi, COVID-19 Vaccine ajak abensaa agiang.***

TETITEKÜMDANGTSÜ
MERATEM NUNG
ANIDAKANG

MASK INOKANG TEKA METSÜKANG LOKTINGPLARLANG KIDANG KAZÜANG

Red Bull Neymar Jr's Five 2021 National Finals atema Spartan FC qualify süogo



Dimapur, Rongjui/September 14, 2021 (TYO): Spartan FC puri Dimapur Qualifiers takok nguogo aser tan September ita Red Bull Neymar Jr's Five National Finals nung Dimapur tenüng nungi parnoki shilem agitsü.

Qatar kübok World Finals linük tenüng nungi asayatsü aser Neymar Jr den ajuruteptsü asoshi parnoki tongtibang mera ka agir asütsü. Red Bull Neymar Jr's Five ya alima tesem ajungalen tenzükba football asayamung ka asütsü, kong team shia nungi nisung pungongo asayar. September 11, 2021 nü City Futsal, Orchid Grounds, Dimapur nung Dimapur Qualifiers tenzük.

Dimapur qualifier nung team 28 agi shilem agiogo. Final nung, Spartan FC-i goal 2-0 agi Blitz FC tsükdaktsü aser September tatemlen National final nung Dimapur tenüng nungi asayatsü.

Red Bull Neymar Jr's Five 2021 City qualifiers ya August 21, 2021 nungi September 12, 2021 tashi Indore, Ahmedabad, Jaipur, Bangalore, Lucknow, Pune, Kolkata, Chennai, Siliguri, Mumbai, Delhi, Hyderabad, Jalandhar, Dimapur, Bhubaneswar, Kochi, Chandigarh aser Goa densema linük kübok yimti 18 nung asayaogo.

Premier League: Everton-i goal 3-1 agi Burnley kokogo

Liverpool, Rongjui/September 14, 2021 (Agencies): Goodison Park nung Everton aser Burnley na Premier League asaya nung, Everton-i goal 3-1 agi Burnley tsükdaktsüba sülen, Premier League point table nung temaba jenjang tongteta alir telok - Manchester United pur den parnok point kasa shi kümogo.

Iba asaya tanabuba half nung, minute 7 tsüngda Everton-i goal asem tashi idakja liasü. Tanabuba half tenzük, Premier League 200buba nung asayasang Ben Mee-i minute 53buba

Qatar kübok Red Bull Neymar Jr's Five 2021 World Finals nung asayatsü asoshi takok angur team temi Red Bull Neymar Jr's Five national final nung tokteptsü.

Red Bull Neymar Jr's Five ya Brazil nung star, Neymar Jr indang asayar pungongi shilem agiba asayamung ka asütsü, kong alima tesem ajunga nung arishi küm 16 nungi 35 tashi football asayatsü jangratemi pei sempet lemsateptsü asoshi ibai sabang ka lir. Iba tetoktepsü nung, team shia nungi asayar pungongo minute 10 atema asayatsü. Asaya mapang, team kati goal idaktsüra tanga team nungi asayar ka asaya nungi tukadoktsüla. Asayar timba aliba team jagi asaya amokbangtsü maongka angur.

Alima tesem ajunga nung ayonga asayaba football asayamung dak sendakba nung, Neymar Jr-i, "Iba asayamung jangratemtsüka lir. Asayamung, temzüng aser box goal atema parnoki kü dang asalentongtem sayuba mapang, kü lanuwa mapang yimdangi aru. Tesüiba küm pezü nungi, nisung 400, 000 dak tema agi qualifier nung shilem agiogo. Iba asayamung nung tetsür team aser tetsür temi jangrabangra aser temaba jenjang nung shilem agiba angudang pelar," ta ashi.

Spartan FC-i 'Dimapur Qualifiers' kokogo aser tan ita Red Bull Neymar Jr's Five National Finals nung parnoki Dimapur tenüng nungi asayatsü.

Red Bull Neymar Jr's Five 2019 nung India nungi takok angur telok Kalina Rangers-i India tenüng nungi Brazil kübok ayongba World Finals nung shilem agiogo. Kalina Rangers ya Mumbai nungi lir aser parnoki Hungary madak takok nguua iba asayamung koktet.

Jr indang Global Five consumer activation kübok asayartemi parnok tasa balala tangoker sayutettsü aser iba record (best play - 60 second max) Instagram (hashtag #outplaythemall, tag @redbullneymarjr'sfive amshiang aser linük wako inokjang) nung lemsateptsü. Neymar aser par teloki item tasa agizükra, taküm indang World Final nung Jr's Global Five ama shilem agitsü asoshi asayar trok aser wild card entry 1 shimtsü.

Maneni, iba asayamung atema, www.redbull.in, Facebook - <http://www.facebook.com/redbull> aser Twitter - <https://twitter.com/redbullindia> website nung osang angutsü. Noksa aser video tem www.redbullcontentpool.com nung download sütettsü.

Andros-i goal tanabuba idaktsü sülen, tatsüka dang lir minute 66buba nung Demarai Gray-i Everton atema goal tasembuba inoktsü.

Iba League nung Everton pur asaya pezü nungi point 10 nguogo aser Premier League point table nung Liverpool, Chelsea aser United den parnok point kasa shi kümogo. Iba asaya mezüng half tashi Burnley puri Everton dang tajungba asaya, saka tan season nung parnoki asaya ka danga kokdanga mali aser point table punlanglen parnok jenjang 18 nung lir.

T20 WC final nung tsükba sülen India team kanga melenshiogo: Smriti Mandhana

Brisbane, Rongjui/September 14, 2021 (Agencies): India tsür cricket team nungi opener, Smriti Mandhana-i, taoba küm World Cup T20 final nung Australia-i India team tsükdaktsür külen nungi, iba telok kanga melenshiogo aser aruya aliba series nung, onoki kanga meranga toktepsü asayatsü renemdar, ta ashi.

Item series rongnung India tetsür team-i mezüng day-night Test asayatsü.

India aser Australia tetsür team anaprongla September 21, 2021 nungi tenzük ODI asem, day-night Test aser T20s asem asayatsü sentong lir. Item format rongnung, team ana tsüngda Test asayamung ya Canberra nung September 30 nungi October 3, 2021 tashi asayatsü.

Taoba küm MCG nung tetsür T20 World Cup final asayaba mapang India aser Australia team tesüsa asaya liasü. Iba asayamung final nung tayonger team-i takok marok angutsü asoshi run 85 agi India tsükdaktsü.

"T20 World Cup final nung tamakok ngur külen nungi asaya tsütsü iba team kanga melenshiogo," ta Mandhana-i 'The Scoop podcast' dang ashi.

Hombarnü, India tsür cricket squad anogo 14 hard hotel quarantine' tembangogo.

"T20 World Cup temer sülen COVID ajanga asayamung tem magiteti mapang talangka anisüngzükka liasü aser team nung asayartemi pei pei talidak asaya yimyatem tajungba angazüktsü aser pei tashimaitba shilem jangjateta melenshitsu asoshi maongka angu," ta lai ashi.

Mandhana-i ashiba agi, COVID-19 tenokdangba sülen, India team pur cricket tajungba asayatsü asoshi lenla aisü nung temelenshi adokogo.

"Team nung asayar ajungai temang anepaluba aser asaya yimya tsütsü meranga inyakogo. Onoki asayamung nung maneni asayati asoshi renemshidar, saka tesüiba ita pungo, trok tashi onok cricket asaya aruogo aser

"Team nung asayar ajungai temang anepaluba aser asaya yimya tsütsü meranga inyakogo. Onoki asayamung nung maneni asayati asoshi renemshidar, saka tesüiba ita pungo, trok tashi onok cricket asaya aruogo aser

tetoktepsü ka nung ama onoki asayatsüba tebilemba lir. Team ajungai iba series nung takok nguua asayatsü imlar," ta lai ashi.

Taküm June aser July ita England den format balala asayaba sülen, India tetsür team Australia tongogo. ODI captain Harmanpreet Kaur, batting asayar tasen Shafali Verma aser Mandhana nungeri 'The Hundred' asayamung nung shilem agiogo.

Opener Mandhana-i ashiba agi, Meg Lanning aser la telok den toktepsü asayatsüba aser iba team batting tsütsü kanga dang tashitait.

"Onoki Australia ama team ka den asayatsü kanga dang jangrar, kechiyong alima nung parnok ya team tajung ka aser asayamung ajak nung parnok dak toktepsü asayaba tanela lir," ta Mandhana-i ashi.

"Australia den asayatsü ta süra tejangraba balaka kümadoker, kechiyong parnoki toktepsü aser jangrabangra asayaba ngur asena asayatsü tali dang ajungmesor," ta lai ashi.

Australia nung century yanglua asayar India tsür rongnung Mandhana asütsü. 2016 küm la arishi küm 19 asüding Blundstone Arena nung lai run 102 yanglua liasü. Ano külen, T20I asayamung nunga Australia nung run timtiba yanglur India tsür rongnung la asütsü.

"Australia kübok pitch ajungai nung ball kanga junga ajoker aser cricket asayar ajaki iba linük nung cricket asayatsü jangrar ama bilemer. Australia nung cricket asayatsü majung ta shingai mashitsu," ta Mandhana-i ashi.

India tetsür cricket team-i Australia nung mezüng pink ball game' asayatsü renemdar.

"Quarantine' asütsü mapang kopika atakzükja aliyonga, cricket asayatsü ta asüding onok peladoker," ta Mandhana-i ashi.

Honibarnü, Australia aser India team tsüngda warm-up match ka asayatsü.

CL atema PSG squad nung Messi o Neymar denogo

Rongjui/September 14, 2021 (Agencies): International asayamung (World Cup Qualifier) nung pei pei National team atema asaya aser Ligue 1 nung shilem magitetba sülen, Bodhbarnü Club Brugge den asayatsü mechi, Paris St Germain indang Champions League squad nung Lionel Messi aser Neymar naprongla denogo.

Taoba hopta, Brehostibarnü Argentina nung Messi aser Brazil nung Neymar naprongla World Cup qualifier nung asayaogo aser Hokolbar aonung tenaprongla Paris tonga aru. Honibarnü, PSG puri Clermont

madak goal 4-0 agi takok anguba asaya nung tenati shilem magi.

Taoba season Champions League nung Manchester City den semi-final asayadang Fernandinho dak tetsüng agi ajemoktsüba atema, UEFA ajanga Argentina team nungi winger, Angel Di Maria asaya asem tashi agienba sülen, PSG squad züngsem 22 nung Angel maden.

Centre back Sergio Ramos-a iba Club nung mezüng asayatsü renem, saka Spain nung Sergio tetsüng yirur aliba ajanga pai iba asaya nung shilem magitsü. Midfielder Marco Verratti temekok yiruba ajanga squad nung pa maniok.

BILEM DANGANG

"Lenmang talang süaka maneni jajara alizüng tongteter."